



ՍԱՀԱԿ ԵՊԻՍԿՈՊՈՍ ՏԵՐ-ՀՈՎՀԱՆՆԻՍՅԱՆ

ՈՂՋՈՒՅՆԻ ԽՈՍՔ ԱՐՏԱՍԱՀՄԱՆՅԱՆ ՊԱՏԳԱՄԱՎՈՐՆԵՐԻՆ

(Ասված Երևանի օդանավակայանում)

Սրբազան և հոգեշնորհ հայրե՛ր, սիրելի պատգամավորնե՛ր.

Ս. Էջմիածնի Գերագույն Հոգևոր Խորհրդի, Մայր Աթոռի միաբանության և Մայր Հայրենիքի հավատացյալ հայ ժողովրդի անունից քաղցր պարտականություն ունեմ, այս պատմական ու նվիրական պահին, սրբազան ողջունելու Ազգային-եկեղեցական սրբազամար ժողովի հարգարժան պատգամավորներին, Մայր Աթոռի հյուրերին և հոգնաշատ ճանապարհորդությունը հանձն առած մեր ուխտավոր հարազատներին:

Դուք բարո՛վ եկաք:

Հեռու թե մոտիկ թեմերից, Արևելքից թե Արևմուտքից, հյուսիսից թե հարավից, հեռավոր ափերից, եկել եք ծնրադրելու մեր նախնայաց և մեր ներկա Սրբություն Սրբոց՝ հայ քրիստոնյա մարդու Լուսո Տաճար՝ Մայր Աթոռ Ս. Էջմիածնի խորանների առաջ, եկել եք համընդունելու դարավոր ու մեռոնարույր սրբությունները, Լուսավորչի արժանավոր հաջորդի Ս. Աջը, Սրբալույս Մեռոնի կաթնաճան, եկել եք համընդունելու Հայրենի սրբազան այս հողը, որի տերն է այսօր մեր ժողովուրդը, և ողջագութելու Մայր Հայրենիքում ապրող ձեր հարազատների հետ, ձեր կարոտն առնելու Հայրենի երկրից և ժողովրդից:

Դուք բարո՛վ եկաք...:

Ձեզանից շատերը առաջին անգամ է, որ ոտք են դնում Հայրենի հողի վրա... այս խորհրդավոր ընդհանրության, ինչպիսի՝ քաղցր ու անանուն զգացումներ ալեկոծում են ձեր հավատավոր ու հայրենասեր հոգին...: Ձեզ համար անմոռանալի պիտի մնան այս ընդհանրությունը, Հայրենիքից և Ս. Էջմիածնից ստացված առաջին ու խորը տպավորությունները:

Դուք բարո՛վ եկաք, մեր թանկագին բաբեկամներ և հարազատներ: Սրանից մոտ մի

տարի առաջ, ձեզանից շատերը այս սրբազան հողերի վրա էին, Հայաստանյայց Առաքելական Եկեղեցու մեծ սգի օրերին, երբ Սփյուռքի մեր սիրելիները եկել էին անկեղծորեն բաժանելու հայ ժողովրդի մեծ վիշտը...

Անցան սգի տխուր օրերը...:

Այսօր դուք եկել եք ուրախ և երջանիկ առիթով, ձեր ձեռքերով վերացնելու սգի սև քողը Հայրապետական Մայր Աթոռի վրայից և մի անգամ ևս ուրախացնելու մեր այրիացյալ եկեղեցին և համախմբվելու Հայրենիքի և Ս. Էջմիածնի շուրջ:

Բարի դալուստի այս սրբազան պահին, մի անգամ ևս ազգովին խոնարհվե՛նք մեծագործ ու հայրենասեր Հայրապետի նվիրական շիրմի և հիշատակի առաջ, ուխտե՛նք վառ պահել Լուսավորչի կանթեղը Մայր Աթոռում և հայ ժողովրդի սրտում և կենսագործե՛նք հանգուցյալ Հայրապետի ազգային եկեղեցական միասնության, հայրենասիրության, եկեղեցասիրության, խաղաղասիրության, կրոնների և ժողովուրդների միջև համերաշխության և համագործակցության վսեմ պատգամները:

Աշխատենք սրբությամբ պահել նրա ազգային միասնության և եկեղեցական միասնականության սրբազան ավանդը, մեր առաջիկա Ազգային-եկեղեցական ժողովում:

Դուք բարո՛վ եկաք, մեր հարազատներ, մեր սիրելիներ:

Թո՛ղ հավետ պայծառ փողփղա Լուսավորչի անմար կանթեղը՝ հայոց կապույտ երկնակամարի վրա...

Թո՛ղ հավետ կանգուն մնա Լուսավորչի Հայրապետական Աթոռը այս պատմական հողերի վրա:

Թո՛ղ ծլի ու ծաղկի հզոր վերելքով՝ անցյալի մոխիրներից վերածնված մեր պանծալի Սովետական Հայաստանը:

